

四庫全書

集部

欽定四庫全書

集部

錢仲文集卷一至五

詳校官太常寺少卿_臣陳桂森

檢討_臣何思鈞覆勘

總校官檢討_臣何思鈞

校對官編修_臣閔懋大

謄錄監生_臣許溶

欽定四庫全書

集部二

錢仲文集

別集類一唐

提要

臣等謹按錢仲文集十卷唐錢起撰起字仲文吳郡人天寶中舉進士官至考功郎中大歷以還詩格初變開寶渾厚之氣漸遠漸漓風調相高稍趨浮響升降之關十子實為之職志起與郎士元其稱首也然溫秀蘊藉不

失風人之旨前輩典刑猶有存焉其集唐志
作一卷晁公武讀書志作二卷今本十卷殆
後人所分其中凡古體詩皆題曰往體考陸
龜蒙松陵集亦以古體為往體蓋唐代詩集
標目有此二名偶然異文別無他義又集末
江行絕句一百首胡震亨唐音統籤以為本
錢翊之詩誤入起集有考辨甚詳然舊本流
傳相沿已久且翊固起孫即附錄祖集之末

亦無不可故今亦仍並存之馬乾隆四十六
年十月恭校上

總纂官臣紀昀陸錫熊臣孫士毅

總校官臣陸費墀

欽定四庫全書

提學
三

欽定四庫全書

錢仲文集卷一

唐 錢起 撰

雜言二十八首

紫參歌 并序

紫參幽芳也五葩連萼狀飛禽羽舉俗名之五鳥花起
故山道人蘭若尤豐此藥杖書劉公詠歌之俾予繼組
遠公林下滿青苔春藥偏宜間石開往往幽人尋水見

時時仙蝶隔雲來
陰陽雕刻花如鳥
對鳳連鷄一何小
春風宛轉虎溪傍
紫翼紅翹翻霽光
貝葉經前無住色
蓮花會裡暫留香
蓬山才子憐幽性
白雪陽春動新詠
應知仙卉老雲霞
莫賞天桃滿蹊逕

瑪瑙杯歌

瑤溪碧岸生奇寶
剖質披心出文藻
良工雕飾明且鮮
得成珍器入芳筵
含華炳麗金罇側
翠竿瓊觴忽無色
繁絃急管催獻酬
倏若飛空生羽翼
瓊瓊蘭英照豹斑

滿堂詞客盡朱顏
花光來去傳香袖
霞影高低傍玉山
王孫彩筆題新詠
碎錦連珠復輝映
世情貴耳不貴奇
謾說海底珊瑚枝
寧及琢磨當妙用
燕歌楚舞長相隨

鋤藥詠

蒔藥穿林復在巘
濃香秀色深能淺
雲氣垂來裛露偏
松陰古處知春晚
拂曙殘鶯百轉催
縈泉帶石幾花開
不隨飛鳥緣枝去
如笑幽人出谷來
對之不覺忘踈懶
廢卷荷鋤嬾日短
豈無萱草樹堦墀
惜爾幽芳世所遺

但使芝蘭出蕭艾不辭手足皆胼胝寧學陶潛空嗜酒
頽齡舍此事東菑

病鶴篇

獨鶴聲哀羽摧折沙頭一點留殘雪三山侶伴能遠翔
五里徘徊忍為別驚羣各畏野人機誰肯相將霞水飛
不及川鳧長比翼隨波雙泛復雙歸碧海滄江深且廣
目盡天倪安得往雲山隔路不隔心宛頸和鳴長在想
何時白霧捲青天接影追飛太液前

片玉篇

至寶未為代所奇，韞靈示璞荆山陞。獨使紅光天子識，
不將清韻世人知。世人所貴惟燕石，美玉對之成瓦礫。
空山埋照凡幾年，古色蒼痕宛自然。重溪羃羃暗雲樹，
一片熒熒光石泉。美人之鑒明且徹，玉指提携嘆奇絕。
試勞香袖拂莓苔，不覺清心皎冰雪。連城美價幸逢時，
命代良工豈見遺。試作珪璋禮天地，何如璠璣在堦墀。

畫鶴篇省中作

點素凝姿任畫工霜毛玉羽照簾櫳借問飛鳴華表上
何如粉績彩屏中文昌宮近芙蓉闕蘭室綰縕香且結
鑪氣朝成緱嶺雲銀燈夜作華亭月日暖花明梁燕歸
應驚片雪在仙闈主人顧盼千金重誰肯徘徊五里飛

秋霖曲

君不見聖主旰食憂元元秋風苦雨暗九門鳳凰池裏
沸泉騰蒼龍闕下生雲根陰精離畢太淹度倦鳥將歸
不知樹愁陰慘淡時殷雷生靈墊溺若寒灰公卿紅粒

鬻丹桂黔首白骨封青苔貂裘玉食張公子魚炙熏天
戟門裏且如歌笑日揮金應笑禹湯能罪已鶴鳴蛙躍
正及時豹隱蘭凋亦可悲焉得太阿決屏翳還令率土
見朝曦

白石枕并序

起與監察御史畢公耀交之厚矣頃於藍水得片石皎
然霜明如其德也許為枕贈之及琢磨將成炎暑已謝
俗曰猶班女之扇可退也君子曰不然此真畢公之佳

賞也故珍而賦之

琢珉勝水碧所貴素且貞曾無白玷不作浮磬鳴捧
來太陽前一片新冰沉沉風憲地待爾秋已至璞堅
難為功誰怨晚成器比德無磷緇論交亦如此

賦得青城山歌送楊杜二郎中赴蜀軍

蜀山西南千萬重仙經最說青城峰青城巖岑倚空碧
遠壓峨眉吞劍壁錦屏雲起易成霞玉洞花明不知夕
星臺二妙逐王師阮瑀軍書王粲詩日落猿聲連玉笛

晴來山翠傍旌旗綠蘿春月營門近知君對酒遙相思

送李大人赴廣州

一賢間氣生麟趾鳳凰羽何意人之望未為王者輔出
鎮忽推才盛哉文且武南越寄維城雄雄推一作寄甲兵

鼓門通幕府天井入軍營厥俗多豪侈古來難致禮唯
君飲冰心可酌貪泉水忠臣感聖君徇義不邀勳龍鏡
逃山魅霜風破嶂雲征途凡幾轉魏闕如在眼向郡海
潮迎指鄉關樹遠按節化甌閩下車佳政新應令尉陀

俗還作上皇人支離交俊哲弱冠至華髮昔許霄漢期

今嗟鵬鷃別圖南不可御惆悵守薄暮

一作劣

送崔校書從軍

鴈門太守能愛賢麟閣書生亦投筆寧唯玉劍報知己
更有龍韜佐師律別馬連嘶出御溝家人幾夜望刀頭
燕南春草傷心色薊北黃雲滿眼愁聞道輕生能擊虜
何嗟少壯不封侯

送張將軍征西

長安少年唯好武，金殿承恩爭破虜。
沙場烽火隔天山，鐵騎征西幾歲還。
戰處黑雲霾瀚海，愁中明月度陽關。
玉笛聲悲離酌晚，金方路極行人遠。
計日霜戈盡敵歸，回首戎城空落暉。
始笑子卿心計失，徒看海上節旄稀。

送脩武元少府

寸祿榮色養，此行寧歎惜。
自今黃綬采蘭時，不厭丹墀芳草色。
百戰荒城復井田，幾家春樹帶人烟。
黎屯久厭蓬飄苦，遲爾西南惠月傳。

送崔十三東遊

千里有同心十年一會面
當杯緩箏柱倏忽催離宴
丹鳳城頭噪晚鴉
行人馬首夕陽斜
灞上春風留別袂
關東新月宿誰家
官柳依依兩鄉色
誰能此別不相憶

送鄔三落第還鄉

郢客文章絕世稀
常嗟時命與心違
十年失路誰知己
千里思親獨遠歸
雲帆春水將何適
日愛東南暮山碧
關中新月對離樽
江上殘花待歸客
名宦無媒自古遲

窮途此別不堪悲，荷衣垂釣且安命。
金馬招賢會有時。

送馬明府赴江陵

陶令南行心自永，江天極目澄秋景。
萬室遙方犬不鳴，雙鳧下處人皆靜。
清風高興得湖山，門柳蕭條雙翟閑。
黃花滿把應相憶，落日登樓北望還。

送畢侍御謫居

崇蘭香死玉簪折，志士吞聲甘徇節。
忠蓋不為明主知，悲來莫向時人說。
滄浪之水見心清，楚客辭天淚滿纓。

百鳥喧喧噪一鷄上林高枝亦難托寧嗟人世棄虞翻
且喜江山得康樂自憐黃綬老嬰身妻子朝來勸隱淪
桃花洞裏舉家去此別相思復幾春

送褚大落第東歸

離琴彈苦調美人慄向隅頃來荷策干明主還復扁舟
歸五湖漢家側席明揚久豈意遺賢在林藪玉堂金馬
隔青雲墨客儒生皆白首昨夢芳洲采白蘋歸期且喜
故園春稚子只思陶令至文君不厭馬卿貧剡中風月

以相憶池上舊遊應再得酒熟寧孤芳杜春詩成不枉
青山色念此那能不羨歸長楊諫獵事皆違他日東流
一乘興知君為我掃荆扉

送傅管記赴蜀軍

終童之死誰繼出燕頷儒生今俊逸主將早知鸚鵡賦
飛書許載蛟龍筆峨眉玉壘指霞標烏沒天低幕府遙
巴山雨色蔽征旆漢水猿聲咽短簫賜璧腰金應可料
才略縱橫年且妙無人不重樂毅賢何敵能當魯連嘯

日暮黃雲千里昏壯心輕別不銷魂
勸君用却龍泉劍
莫負平生國士恩

送張少府

愁雲破斜照別酌勸行子蓬驚馬首風
鴈拂天邊水寸
晷如三歲離心在萬里

行路難

君不見明星映空月太陽朝升光盡歇
君不見凋零委
路蓬長風飄舉入雲中由來人事何嘗定
且莫驕奢笑

賤窮

盧龍塞行送韋掌記

雨雪紛紛黑山外
行人共指盧龍塞
萬里飛沙咽鼓聲
三軍殺氣凝旌旆
陳琳書記本翩翩
料敵張兵奪酒泉
聖主好文兼好武
封侯莫比漢皇年

效古秋夜長

秋漢飛玉霜
北風掃荷香
含情紡織孤燈盡
拭淚相思寒漏長
蒼前碧雲靜如水
月弔棲烏啼鳥起
誰家少婦

事駕機錦幕雲屏深掩扉白玉窻中聞落葉應憐寒女
獨無衣

卧病李員外題扉而去

僻陋病者居蒿萊行逕失誰知簪紱貴能問幽憂疾珂
聲未駐門蘭氣先入室沉痾不冠帶安得候蓬葦清揚
去莫尋離念頃來侵雀栖高窻靜日出脩桐陰枕上憶
君子悄悄唯苦心

訓王維春夜竹亭贈別

山月隨客來主人興不淺今宵竹林下誰覺花源遠惆
悵曙鶯啼孤雲遠絕巘

山中寄時校書

蓬萊紫氣溫如玉唯予知爾陽春曲別來幾日芳蓀綠
百花酒滿不見君青山一望心斷續

送李四擢第歸覲省

當年貴得意文字各爭名齊唱陽春曲唯君金玉聲懸
黎寶中出高價世難掩鴻羽不低飛龍津徒自險直矜

鸚鵡賦不貴芳桂枝少俊蔡邕許長鳴唐舉知梁城下
熊軾朱戟何暉耀才子欲歸寧裳花已含笑高門知慶
大子孝覺親榮獨攬還珠美寧唯問絹情離筵不盡醉
搯袂一何早馬蹄西別輕樹色東看好行塵忽不見惆
悵青門道

哭曹鈞

苦節推白首憐君負此生忠蓋名空在家貧道不行朝
來相憶訪蓬蓽只謂淵明猶卧疾忽見江南弔鶴來始

知天下文星失嘗恨知音千古稀那堪夫子九泉歸一
聲隣笛殘陽裏酌酒空堂淚滿衣

錢仲文集卷一

欽定四庫全書

錢仲文集卷二

唐 錢起 撰

五言往體四韻五首 五韻十首

六韻二十四首

東陽郡齋中詣南山招韋十

霽來海半山隱映城上起中峰落照時殘雪翠微裏同
心久為別孤興那對此良會何遲遲清揚瞻則邇

清泥驛迎獻王侍郎

候館掃清晝使車出明光森入郭樹一道引飛霜仰
視驄花白多慚綬色黃鶴鷓無羽翼願假憲烏翔

沐陽古渡作

日落問津處雲霞殘碧空牧牛避田燒退鷓隨潮風迴
首故鄉遠臨流此路窮翩翩青冥去羨彼高飛鴻

卧疾答劉道士

白露蠶已絲空林日淒清寥寥晝扉掩獨卧秋窓明寶

字比仙藥羽人寄柴荆長吟想風馭恍若升蓬瀛

夢尋西山準上人

別處秋泉聲至今猶在耳何嘗夢魂去不見雪山子新
月隔林時千峰翠微裏言念心更寂跡滅雲自起

長安旅宿

九秋旅夜長萬感何時歇蕙花漸寒暮心事猶楚越直
躬遭世道咫尺步隔天闕每聞長樂鐘載泣靈臺月明日
北門外歸途堪白髮

過桐栢山

秋風過楚山山靜秋聲晚賞心無定極仙步亦清遠返
照雲竇空寒流石苔淺羽人昔已去靈跡欣方踐投策
謝歸途世緣從此遣

李士曹廳對雨

春雨暗重城訟庭深更寂終朝人吏少滿院煙雲集濕
鳥壓花枝新苔宜砌石掾曹富文史清興對詞客愛爾
蕙蘭叢芳香飽時澤

登勝果寺南樓雨中望嚴協律

微雨侵晚陽連山半藏碧林端陟香榭雲外遲來客孤
村凝片烟去水生遠白但佳川原趣不覺城池夕更喜
眼中人清光漸咫尺

冬夜題旅館

退飛憶林藪樂業羨黎庶四海盡窮途一枝無宿處嚴
冬北風急中夜哀鴻去孤燭思何深寒窓坐難曙勞歌
待明發惆悵盈百慮

自終南山晚歸

采苓日往還得性非樵隱
白水到初濶青山辭尚近
絕境勝無倪歸途興不盡
沮溺時返顧牛羊自相引
逍遙不外求塵慮從茲泯

早渡伊川見舊作

鷓鴣鳴早霜秋水寒
旅涉漁人昔隣舍相見具舟楫
出浦興未盡向山心更愜
村落通白雲茅茨隱紅葉
東臯滿時稼歸客欣復業

夕發箭場巖下作

行役不遑安在幽機轉發山谷無明晦溪霞自興沒朝
櫛杉下風夕飲石上月懿爾青雲士垂纓朝鳳闕寧知
採竹人每食慚薇蕨

同李五夕次香山精舍訪憲上人

彼岸聞山鐘仙舟過苔水松門入幽映石逕趨逸運初
月開草堂遠公方覲止忘言在閑夜凝念得微理泠泠
功德池相與滌心耳

雨中望海上懷鬱林觀中道侶

山觀海頭雨懸森動烟樹只疑蒼茫裏鬱鳥欲飛去大
塊怒天吳驚潮蕩雲路羣真儼盈想一葦不可渡惆悵
赤城期願假輕鴻馭

廣德初鑿駕出闕後登高愁望

二首

長安不可望望處愁邊起輦轂混戎夷山河空表裏黃
雲壓城闕斜照移烽壘漢幟遠成霞胡馬來如蟻不知
涿鹿戰早晚虫尤死渴日候河清沉憂催暮齒

二

愁看秦川色慘慘雲景晦乾坤暫運行品物遺覆載黃
塵漲戎馬紫氣隨龍旆掩泣指關東日月妖氛外臣心
寄遠水朝海去如帶周德更休明天衢佇開泰

過曹鈞隱居

荃蕙有奇性馨香道為人不居衆芳下寧老空林春之
子秉高節攻文還守真素書寸陰盡流水怨情一作聲新
濟濟振纓客煙霄各致身誰當舉玄宴不使作良臣

獨往覆釜山寄郎士元

賞心無遠近芳月好登望勝事引幽人山下復山上將
尋洞中藥復愛湖外嶂古壁苔入雲陰溪樹穿浪誰言
世緣絕更惜知音曠鶯啼綠蘿春迴首還惆悵

送王季友赴洪州幕下

列郡皆用武南征所從誰諸侯重才略見子如瓊枝撫
劍感知已出門方遠辭煙波帶幕府海日生紅旗問我
何功德負恩留玉墀銷魂把別袂愧爾酬明時

客舍贈鄭賁

結交意不薄，匪席言莫違。
世義隨波以，人生知己稀。
先鳴誓相達，未遇還相依。
一望金門詔，三看黃鳥飛。
暝投同旅食，朝出易儒衣。
嵇向林廬接，携手行將歸。

山中春仲寄汝上王恒潁川沈冲

隱者守恬泊，春山日深淨。
誰知蟠木材，得性無人境。
座隅泉出洞，竹上雲起嶺。
飢狄入山厨，飲虹過藥井。
前溪堪放逸，仲月好風景。
遊目來遠思，摘芳寄汝潁。

南中春意

入仕無知言遊方隨世道平生願開濟遇物千懷抱已
阻青雲期甘同散樗老客遊南海曲坐見韶陽蚤舊國
別佳人他鄉思芳草惜無鴻鵠翅安得凌蒼昊

東陵藥堂寄張道士

木落蒼山空當軒秋水色清旦振衣坐永吟意何極願
言金丹壽一假鸞鳳翼日夕開真經言忘心更默玄都
有仙子採草早相識煙露難再期焚香空歎息

苦雨憶皇甫冉

涼雨門巷深窮居成習靜獨吟愁霖雨更使秋思永疲
疴苦昏墊日夕開軒屏草木森已悲衾幃清且冷如何
遊宦客江海隨泛梗延首長相思憂襟孰能整

寄任山人

天階崇黼黻世路有趨競獨抱中孚文誰知苦寒詠行
潦難朝海散材空遇聖豈無鳴鳳時其如問津命所思
青山郭再夢綠蘿逕林泉春可遊羨爾得其性

登秦嶺半巖遇雨

屏翳忽騰氣浮陽慘無暉
千峰挂飛雨百尺搖翠微
震電閃雲逕奔流翻石磯
倚巖假松蓋臨水羨荷衣
不得采苓去空思乘月歸
且憐東臯上水色侵荆扉

水色一作忝色

杪秋南山西峰題準上人蘭若

向山看霽色步步豁幽性
返照亂沅明寒空千嶂淨
石門有餘好霞殘月欲映
上詣遠公廬孤峰懸一逕
雲裏隔窻火松下聞山磬
客到兩忘言猿心與禪定

田園雨後贈隣人

安排常任性，偃卧晚開戶。
樵客荷蓑歸，向來春山雨。
殘雲虹未落，返景霞初吐。
時鳥鳴村墟，新泉遶林圃。
堯年尚恬泊，隣里成太古。
室爾人遂遙，相思怨芳杜。

天門谷題孫逸人石壁

崖石亂流處，竹深斜照歸。
主人卧礪石，心耳滌清暉。
春雷近作解空谷，半芳菲。
雲棟綠虹宿，藥圃蝴蝶飛。
惡躡慕嘉遁，幾夜瞻少微。
相見竟何說，忘情同息機。

藍溪休沐寄趙八給事

蟲鳴歸舊里田野秋農閑
即事敦風尚衡門方再闕
夕陽入東籬爽氣高前山
霜蕙後時老巢禽知暝還
侍臣黃樞寵鳴玉青雲間
肯想觀魚處寒泉照髮斑

送輞川至南山寄谷口王十六

山色不厭遠我行隨處深
蹟幽青蘿逕思絕孤霞岑
獨鶴引過浦鳴猿呼入林
褰裳百泉裏一步一清心
王子在何處隔雲雞犬音
折麻定延佇乘月期招尋

藍田溪與漁者宿

獨遊屢忘歸，况此隱淪處。
濯髮清泠泉，月明不能去。
更憐垂綸叟，靜若沙上鷺。
一論白雲心，千里蒼洲趣。
蘆中夜火盡，浦口秋山曙。
歎息分枝禽，何時更相遇。

淮上別范大

悲風隕涼葉，送歸怨南楚。
窮年將別離，寸晷申宴語。
長淮流不盡，征棹忽復舉。
碧落半愁雲，黃鶴時顧侶。
遊宦且未達，前途各脩阻。
分袂一相嗟，良辰更何許。

雜居夜雨奉寄李京兆

永夜不可度蛩吟秋雨滴寂寞想章臺始歎雲泥隔雷
聲匪君車猶時過我廬電影非君燭猶能明我目如何
瓊樹枝夢裡看不足望望佳期阻愁生寒草綠

歎畢少府以持法無隱見繫

用法本禁邪盡心翻自極畢公在囹圄世事何紕繆翠
鳳呈其瑞虞羅寄殺翼囚中千念時窓外百花色落景
閉圓扉春蟲網叢棘古人不念文紛淚莫沾臆

小園招隱

支離鮮兄弟形影如手足但遂飲冰節甘辭代耕祿斑
衣在林巷始覺無羈束交柯低戶陰閑鳥將雛宿窮通
世情阻日夜苔徑綠誰言北郭貧能分晏嬰粟

過溫逸人舊居

返真難合道懷舊仍無弔浮俗漸澆漓斯人誰繼妙聲
容在心耳寧覺阻言笑玄堂閉幾春拱木齊雲嶠鶴傳
居士舞猿得蘇門嘯酌酒片陽微空山想埋照

縣內水亭晨興聽訟

晨光起宿露池上判黎甿借問秋泉色如何拙宦情磨
鉛辱利用策蹇愁前程昨夜明月滿中心如鵲驚負恩
時易失多病績難成坐惜寒塘晚霜風吹杜蘅

錢仲文集卷二

欽定四庫全書

錢仲文集卷三

唐 錢起 撰

五言七韻往體九首

八韻十一首

長韻十二首

海畔秋思

匡濟難道合去留
隨興牽偶為謝客
事不顧平子田魏
闕賁翹楚此身長
棄捐箕裘空在念
拙拙誰推賢無用

即明代養痾仍壯年日夕望佳期帝鄉路幾千秋風晨
夜起零落愁芳荃

太子李舍人城東別業

一作李祭酒別業俯
視川林前帶雷岫

南山轉羣木昏曉擁山翠小澤近龍居清蒼常雨氣君
家北原上千金買勝事丹闕退朝迴白雲迎賞至新晴
村落外處處煙景異片水明斷岸餘霞入古寺東臯指
歸翼目盡有餘意

谷口新居寄同省朋故

種黍傍煙溪榛蕪兼沮洳亦知生計薄所貴隱身處
橡栗石上材莓苔水中路蕭然授衣日得此還山趣汲井
愛秋泉結茅因古樹閑雲與幽鳥對我不能去寄謝鶯
鷺羣狎鷗拙所慕

京兆尹廳前甘棠樹降甘露

內史用堯意理京宣惠慈氣和祥則降孰謂天難知濟
早露為兆有如墁應篋豈無天桃樹洒此甘棠枝玉色
與人淨珠光臨筆垂協風與之俱物性皆熙熙何必鳳

池上方看作霖時

秋夜作

萬計各無成寸心日悠漫浮生竟何窮巧厯不能算流
落四海間辛勤百年半商歌向秋月良韻兼浩歎寤寐
怨佳期美人隔霄漢寒雲度窮水別業繞垂幔窻中問
談難長夜何時旦

觀村人收山田

六府且未盈三農爭務作貧民乏井稅墾土皆墾鑿禾

黍入寒雲茫茫半山郭秋來積霖雨霜降方銍獲中田
聚藜芒反景空村落顧慚不耕者微祿同衛鶴庶追周
任言敢負謝生諾

裴侍郎湘川迴以青竹筒相遺因而贈之

楚竹青玉潤從來湘水陰緘書取直節君子知虛心入
用隨憲簡積文不受金體將丹鳳直色映秋霜深寧肯
假伶倫謬為龍鳳吟唯將翰院客昔秘瑤華音長跪捧
嘉貺歲寒慚所欽

東城初陷與薛員外王補闕暝投南山佛寺

日吳石門裏松聲山寺寒香雲空靜影定水無驚湍洗
足解塵纓忽覺天形寬清鐘揚虛谷微月深重巒噫我
朝露世翻浮與波瀾行運邁憂患何緣親盤桓庶將鏡
中象盡作無生觀

奉和張荊州巡農晚望

太清霽雲雷陽春陶物象明牧行春令仁風助昇長時
和俗勤業播植農厥壤陰陰桑陌連漠漠水田廣郡中

忽無事方外還獨往日暮駐歸軒湖山有佳賞宣城傳
逸韻千載誰此響

送包何東遊

水國嘗獨往送君還念茲湖山遠近色昏旦煙霞時子
好謝公跡常吟孤嶼詩果乘扁舟去若與白鷗期野趣
及春好客遊欣此辭入雲投館僻采碧過帆遲江上日
回首琴中勞別思春鴻刷歸翼一寄杜蘅枝

酬陶六辭秩歸舊居見東

靖節昔高尚令孫嗣清徽舊廬雲峯下獻歲車騎歸去
俗因解綬憶山得採薇田疇春事起里巷相尋稀淵明
醉乘興閑門祇掩扉花禽驚曙月隣女上鳴機畢娶願
已果養恬志寧違吾當掛朝服同爾緝荷衣

奉使採箭筈竹谷中晨興赴嶺

孤客倦夜坐聞猿乘早發背溪已斜漢登棧尚殘月重
峯轉森爽幽步更超越雲木聳鶴巢風蘿掃虎穴人羣
徒自遠世役終難歇入山非買山采竹異采蕨誰見子

牟意惜勞書魏闕

同巖逸人東溪泛舟

子陵江海心高跡此間放漁舟在溪水曾是敦風尚朝
霽收雲物垂綸獨清曠寒花古岸傍唳鶴晴沙上紛吾
好貞逸不遠來相訪已接方外遠仍陪郢中唱歡言盡
佳酌高興延秋望日暮浩歌還紅霞亂青嶂

過沈氏山居

雞鳴孤煙起靜者能卜築喬木出雲心閒門掩山腹貧

交喜相見把臂歡不足空林留宴言永日清耳目泉聲
冷樽俎荷氣香童僕往往仙犬鳴樵人度深竹酒酣出
谷口世網何羈束始願今不從區區折腰祿

贈栢巖老人

日與麋鹿羣賢哉買山叟龐眉忽相見避世一何久林
栖古崖曲野事佳春後瓠葉覆荆扉栗苞垂甕牖獨歌
還獨酌不耕亦不耦磽田隔雲溪多雨長狼莠煙霞得
情性身世同芻狗寄謝營道人天真此翁有

送薛判官赴蜀

橫笛聲轉悲羽觴酣欲別舉目叩關遠離心不可說邊
陞勞帝念日下降才傑路極巴水長天銜劍峰缺單車
動夙夜越境正炎節星橋過客稀火井蒸雲熱陰符能
制勝千里在坐決始見儒者雄長纓繫餘孽

詔許昌崔明府拜補闕

儒者久營道詔書方問賢至精一耀世高步誰同年何
樹可棲鳳高梧枝拂天脫身鳧鳥裏載筆虎闡前日月

傳軒后衣冠真列仙則知驪龍珠不秘清泠泉才子貴
難見郢歌空復傳惜哉效顰客心想勞嬋娟

仲春晚尋覆釜山

蝴蝶弄和風飛花不知晚王孫尋芳草步步忘路遠況
我愛青山涉趣皆遊踐縈迴必中路陰晦陽復顯古岸
生新泉霞峰映雪巘交枝花色異奇石雲根淺碧洞志
忘歸紫芝行可搴方嗤嵇叔夜林臥方沈酒

贈東隣鄭少府

一聞白雪唱願見清揚久誰謂結綬來得陪趨府後小
邑藍溪上卑棲愜所偶妄言復連牆片月亦携手草色
同春遲鶯聲共高柳美景百花時平生一盃酒聖朝法
天地以我為芻狗秩滿歸白雲期君訪谷口

謝張法曹萬頃小山假景見憶

樂道隨去處養和解朝簪茅堂近丹闕佳致亦何深退
食不趨府忘機還在林清風亂流上永日小山陰解籜
雨中竹將雛花際禽物華對幽寂絃酌兼詠吟自昔仰

高步及茲勞所欽
郢歌叨繼組知己復知音

罷章陵令山居過中峰道者

寧辭園令秩不改淵明調
解印無與言見山始一笑
幽人還絕境誰道苦奔峭
隨雲剽渡溪出門更垂釣
吾廬青霞裏窻樹玄猿嘯
微月清風來方知散髮妙

又

丘壑趣如此暮年始樓偃
賴遇無心雲不笑歸來晚
鳴鳩拂紅枝初服傍清畎
昨日山僧來猶嫌嘉遁淺
託君

紫陽家路滅心更遠梯雲創其居抱犢上絕巘杏田溪
一曲霞境峰幾轉路石掛飛泉謝公應在眼願言攜手
去採藥長不返

登覆釜山過道人

二首

晨策趣無涯名山深轉秀三休變覆景萬轉迷宇宙攀
崖到天窓入洞窮玉溜側逕蹲怪石飛蘿擲鷲抗花間
鍊藥人雞犬味乳竇散髮便迎客采芝仍滿袖郭璞賦
遊仙始願今可就

又

真氣重嶂裏知君嘉遁幽山階壓丹穴藥井通伏流道
者帶經出洞中携我遊欲驟白虬去且為紫芝留忽憶
武陵事別家疑數秋

尋華山雲臺觀道士

秋日西山明勝趣引孤策桃源數曲盡洞口兩岸折還
從固象來忽得仙靈宅霓裳誰之子霞酌能止客殘陽
在翠微携手更登歷林行拂煙雨溪望亂金碧飛鳥下

天窻裏松際雲壁稍尋玄蹤遠宛入寥天寂願言葛仙
翁終年鍊玉液

海上臥病寄王臨

離客窮海陰蕭辰歸思結一隨浮雲滯幾怨黃鵠別妙
年即沉痾生事多所闕劍中負明義枕上惜玄髮之子
良史才華簪偶時哲相思千里道愁望飛鳥絕歲暮冰
雪寒淮湖不可越百年去心慮孤影守薄劣獨餘慕侶
情金石無休歇

登玉山諸峰偶至悟真寺

郭南雲水佳，訟簡野情發。紫芝每相引，黃綬不能謀。稍
入石門幽，始知靈境絕。冥搜未寸晷，仙逕俄九折。蟠木
蓋石梁，崩岸露雲穴。數峰拔崑崙，秀色與空澈。玉氣交
晴虹，桂花留曙月。半巖採珉者，一點如片雪。真賞無前
程，竒觀寧暫輟。更聞東林磬，可聽不可說。興中尋覺化，
寂爾諸象滅。

長安客舍贈李行父明府

藏器待時少知人自古難遂令丹穴鳳晚食金琅玕誰
謂兵戈際鳴琴方一彈理煩善用簡濟猛能兼寬夙夜
念黎庶寢興非宴安洪波未靜壑何樹不驚鸞鳧鳥傍
京輦忙心懸灌壇高槐暗苦雨長劍生秋寒旅食還時
客飢年亦盡歡親勞攜斗水往往救泥蟠但恐酬明義
蹉跎芳歲闌

美楊侍御清文見示

伯牙道喪來絃絕無人續誰知絕唱後更有難和曲層

峯與清流逸勢競奔盛清文不出戶仿佛皆在目霧雪
看滿懷蘭荃坐盈掬孤光碧潭月一片崑崙玉初見歌
陽春韶光變枯木再見吟白雪便覺雲肅肅則知造化
源方寸能展縮斯文不易遇清爽心豈足願言書諸紳
可以為佩服

山居新種花藥與道士同遊賦詩

自樂魚鳥性寧求農牧資淺深愛巖壑疏鑿盡幽奇雨
花相助好鶯鳴春草時種蘭入山翠引葛上花枝風露

拆紅紫綠溪復映池新泉香杜若片石引江籬宛謂武陵洞潛應造化移杖策攜烟客滿袖掇芳蕤蝴蝶舞留我仙雞閑傍籬但令黃精熟不慮韶光遲笑指雲蘿逕
樵人那得知

初黃綬赴藍田縣作

蟠木無匠伯終年棄山樊苦心非良知安得入君門忽
忝英達顧寧窺造化恩螢光起腐草雲翼騰沉鯤片石
世可用良工心所存一切尉京甸三省漸黎元賢尹正

趨府僕夫儼歸軒眼中縣胥色耳裏蒼生言居人散山
水即景真桃源鹿聚入田逕雞鳴隔嶺村漁和俗久清
到邑政空論且嘉訟庭寂前階滿芳蓀

歸義寺題震上人壁

寺即神堯皇帝讀書之
所龍飛後創為精舍

入谷逢雨花香綠引幽步招提饒泉石萬轉同一趣向
背森碧峰淺深羅古樹堯皇未登極此地曾隱霧秘識
得神謀因高思虎路太陽忽臨照物象俄先煦梵王宮
始開長者金先布白水入禪境磻山通覺路往往無心

雲猶起潛龍處仍聞七祖後佛子繼調御溪鳥投慧燈
山蟬飽甘露不作解纓客寧知捨筏喻身世已悟空歸
途復何去

錢仲文集卷三

欽定四庫全書

錢仲文集卷四

唐 錢起 撰

五言四韻近體五十首

奉和聖製登會昌山應制

睿想入希夷，真遊到具茨。
玉鑿登嶂遠，雲輅出花遲。
泉壑凝神處，陽和布澤時。
六龍多順動，四海正雍熙。

省中對雪寄元判官拾遺昆季

萬點瑤臺雪飛來錦帳前瓊枝應比淨鶴髮敢爭先散
影成花月流光透竹煙今朝謝家興幾處郢歌傳

山齋獨坐喜玄上人夕至

舍下虎溪徑煙霞入暝開柴門兼竹靜山月與僧來心
瑩蓮花水言忘綠茗杯前峯曙乳好斜漢欲西迴

秋夜寄張韋二主簿

涼夜褰_以簾好輕雲過月初碧空河色淺紅葉雨聲虛道
阻天難問機忘世易踈不知雙翠鳳棲棘復何如

歸故山路逢隱居者

握手雲棲路，潛然恨幾重。
誰知綠林盜，長占彩霞峯。
心死池塘草，聲悲石徑松。
無因芳杜月，琴酒更相逢。

落第劉拾遺相送東歸

不醉百花酒，傷心千里歸。
獨收和氏玉，還採舊山薇。
出處離心盡，榮枯會面稀。
預愁芳草色，一徑入衡闈。

和劉七讀書

夜雨深館靜，苦心黃卷前。
雲陰留墨沼，螢影傍華編。
夢

金匱要略卷四
卷四
鳥富青藻通經仍妙年何愁丹穴鳳不飲玉池泉

早下江寧

暮天微雨散涼吹片帆輕雲物高秋節山川孤客情霜
蘋留楚水寒鴈別吳城宿浦有歸夢愁猿莫夜鳴

登復州南樓

孤樹延春日他山捲曙霞客心湖上鴈歸思日邊花行
李迷方久歸期涉歲餘故人雲路隔何處寄瑤華

江陵晦日陪諸官泛舟

節物堪為樂江湖有主人舟行深更好山趣久彌新
樽酒平生意烟花異國春城南無夜月長袖莫留賓

縣城秋夕

山城日易夕愁生先掩扉俸薄不沽酒家貧忘投衣
露重蕙花落月冷莎雞飛効拙慚無補雲林嘆再歸

秋夜梁七兵曹同宿 二首

一笑不可得同心相見稀摘菱頻貰酒待月未扃扉
星影低驚鵲蟲聲傍旅衣早棲歲已晚共羨鴈南飛

好欲棄吳道今宵又遇君老夫相勸酒稚子待題文月
下誰家笛城頭幾片雲如何此幽興明日重離羣

和萬年成少府寓直

赤縣新秋夜文人藻思催鐘聲自仙掖月色近霜臺一
葉兼螢度孤雲帶雁來明朝紫書下應問長卿才

春夜過長孫繹別業

佳期難再得清夜此雲林帶竹新泉冷穿花片月深含
毫凝逸思酌水話幽心不覺星河轉山枝驚曙禽

題溫處士山居

誰知白雲裏別有綠蘿春
苔繞溪邊徑花侵洞裏人
逸妻看種藥稚子伴垂綸
願上逃堯者何如養此真

題陳季壁

郢人何苦調飲水仍布衾
烟火晝不起蓬蒿春欲深
前庭少喬木鄰舍聞新禽
雖有徵賢詔終傷不遇心

贈鄰居齊六司倉

沉冥衆所遺咫尺絕佳期
始覺衡門下儵然太古時
雞

聲共隣巷燭影隔茅茨坐惜牛羊迺芳蓀白露滋

送征雁

秋空萬里淨嘹唳獨南征風急翻霜冷雲開見月驚塞
長怯去翼影滅有餘聲悵望遙天外鄉愁滿日生

宴鬱林觀張道士房

滅跡人間世忘歸象外情竹壇秋月冷山殿夜鐘清仙
侶披雲集霞杯遠曙傾同歡不可再朝暮赤龍迎

秋夕與梁鎰文宴

客到衡門下林香蕙草時好風能自至明月不須期秋

日翻荷影晴光脆柳枝留歡美清夜寧覺曉鍾遲

南薰作微

官是底物許
日廢言詩

哭空寂寺玄上人

五句一作古
松韻舊榻

悽然雙樹下垂淚遠公房燈續生前火爐添沒後香陰
階明片雪寒竹嚮空廊寂滅應為樂塵心徒自傷

題精舍寺

勝景不易遇入門神頓清房房占山色處處分泉聲詩

思竹間得道心松下生何時來此地擺落世間情

開元觀遇張侍御

碧落忘歸處佳期不厭逢
晚涼生玉井新暑避煙松
欲醉流霞酌還醒度竹鍾
更憐琪樹下歷歷見遙峯

和人秋歸終南山別業

舊居三顧後晚節重幽尋
野逕到門盡山窻連竹陰
昔年鶯出谷今日鳳歸林
物外凌雲操誰能繼此心

故相國苗公挽歌

霸陵誰寵葬漢主念蕭何盛業留青史浮榮逐逝波隴
雲仍作雨薤露已成歌悽愴平津閣秋風弔客過

酌劉員外雨中見寄

苦雨滴蘭砌秋風生葛衣潢污三逕絕碓杵四隣稀分
與玄豹隱不為湘燕飛慙君角巾折猶肯問衡闈

賦得歸雲送李山人歸華山

秀色橫千里歸雲積幾重欲依毛女岫初卷少夷峯蓋
影隨征馬衣香拂卧龍祇應函谷上真氣日溶溶

過裴長官新亭

茅屋多新意芳林昨試移
野人知石路戲鳥認花枝
慢水縈蓬戶閒雲掛竹籬
到家成一醉歸馬不能騎

寄郢州郎士元使君

龍節知無事江城不掩扉
詩傳過客遠書到故人稀
坐嘯看潮起行春送雁歸
望舒三五夜思盡謝元暉

過長孫宅與郎上人茶會

偶與息心侶忘歸才子家
玄談兼藻思綠茗代榴花
岸

幘看雲卷含毫任景斜
松喬若逢此不復醉流霞

下第題長安客舍

不遂青雲望愁看黃鳥飛
梨花度寒食客子未春衣
世事隨時變交情與我違
空餘主人柳相見却依依

陪考功王員外城東池亭宴

無雙錦帳郎絕境有林塘
鶴靜疎羣羽蓮開失衆芳
晴山看不厭流水趣何長
日晚催歸騎鍾聲下夕陽

過孫員外藍田山居

不知香署客謝病翠微間去幄蘭將老辭車雉亦閒近
山雲出洞當戶竹連山對酒溪霞晚家人採蕨還

秋園晚沐

黃卷在窮巷歸來生道心五株衰柳下三徑小園深倒
薤翻成字寒花不假林龐眉謝羣彥獨酌且閒吟

窮秋對雨

晦日連苦雨動息更遄迴生事萍無定愁心雲不開瞿
門悲暝雀黑竈上寒苔始信宣城守乘流畏曝腮

裴迪南門秋夜對月

夜來詩酒興月滿謝公樓

一作月上

影閉重門靜寒生獨樹

秋鶴

一作鶻

驚隨葉散螢遠入煙流今夕遙天末清光

一作

暉幾處愁

和蜀縣段明府秋城望歸期

製錦蜀江靜飛鳧漢闕遙一茲風靡草再視露盈條旅
望多愁思秋天更次寥河陽傳麗藻清韻入歌謠

晚歸藍田酬王維給事贈別

卑棲却得性每與白雲歸徇祿仍懷橘看山免採薇

一作

別山如昨日春露已霑衣
米蕨頻盈手看花空厭歸暮禽先去馬新月待開扉霄

漢時回首知音青鎖闈

再得畢侍御書聞巴中卧病

芳信來相續同心遠更親數重雲外樹不隔眼中人夢

寐花驄色相思黃鳥春

一作
蕙草

更聞公幹病一夜二毛新

宿新里館

愁人待曉難秋雨暗淒淒度燭螢時滅傳書雁漸低客

來知計誤夢裏泣津迷無以逃悲思寒蟿處處啼一本有五

韻從迷字下云每食皆彈缺歸山
柰杖藜叔牙先得路何日救沉泥

谷口書齋寄楊補闕

泉壑帶茅茨雲霞生薜帷
竹憐新雨後山愛夕陽時
閒鷺棲常早秋花落更遲
家童掃蘿逕昨與故人期

衡門春夜

不厭晴林下微風度葛巾
寧唯北窻月一作自謂上皇

人叢篠輕新暑孤花占晚春
寄言莊叟蝶與爾得天真

題吳通微主人

食貧無盡日有願幾時諧

一作不知青雲
器良願幾時諧

長嘯秋光晚

誰知志士懷朝烟不起竈寒葉欲連階飲水仍留我孤

燈點

一作吟
詩靜

夜齋

晚次宿預館

鄉心不可問秋氣又相逢飄泊方千里離悲復幾重迴
雲隨去雁寒露滴鳴蛩延頸遙天末如聞故國鍾

藍上茅茨期王維補闕

山中人不見雲去夕陽過淺瀨寒魚少叢蘭秋蝶多老年踈世事幽性樂天和酒熟思才子溪頭望玉珂

春夜寓直

養性慣雲臥為郎如鳥棲不知仙閣峻惟覺玉繩低帳
喜香煙暖詩慚賜筆題未央春漏促殘夢謝晨雞

新昌里言懷

性拙偶從宦心閒多掩扉雖看北堂草不忘舊山薇花
月霽來好雲泉堪夢歸如何建章漏催著早朝衣

秋夜寄袁中丞王員外

一夕盈千念方知別者勞
衰榮難會面魂夢

一作喜

暫同

袍片月臨階早清河度雁
高應憐蔣生逕秋露滿蓬蒿
九日間居寄登高數子

初服棲窮巷重陽憶舊遊
門閒謝病日心醉授衣秋
酒盡寒花笑庭空暝雀愁
今朝落帽客幾處管絃留

錢仲文集卷四

欽定四庫全書

錢仲文集卷五

唐 錢起 撰

五言四韻近體五十首

晚入宣城界

斜日片帆陰
春風孤客心
山來指樵路
岸去惜花林
海氣蒸雲黑
潮聲隔雨深
鄉愁不可道
浦宿聽猿吟

靜夜酬通上人問疾

東林生早涼高枕遠公房
大士看心後中宵清漏長
驚蟬出暗柳微月隱迴廊
何事沉痾久含毫問藥王

奉陪使君十四叔晚憩大雲門寺

野寺千家外間行晚暫過
炎氛臨水盡夕照傍林多
境對知心妄人安覺政和
繩牀搖麈尾佳趣滿滄波

省中春暮酬嵩陽焦道士見招

朝花飛暝林對酒傷春心
流年催素髮不覺映華簪
垂老遇知己一作明代訓恩看寸陰
如何紫芝客一作多慚紫陽客相

憶白雲深

酬苗發員外宿龍池寺見寄

寧知待漏客清夜此從容

一作在雲松

暫別迎車雉還隨護

法龍香烟輕上月林嶺

一作
栖鶴

靜聞鐘郢曲傳甘露塵心

洗幾重

貞懿皇后挽詞

淑麗詩傳美徽章禮飾良有恩加象服無日記高襟
月孤秋殿寒山出夜臺通靈深眷想青鳥獨飛來

歲初歸舊山

欲知愚谷好久別與春還
鶯煖初歸樹雲晴却戀山石
田耕種少野客性一作舊情閒求仲應難見殘陽且掩關

鑿駕避狄歲別韓雲卿

白髮壯心死愁看國步移
關山慘無色親愛忽驚離影
絕龍分劍聲哀鳥戀枝
茫茫雲海外相憶不相知

詠白油帽送客

薄質慚加首愁陰幸庇身
卷舒無定日行止必依人已

沐脂膏惠寧辭雨露頻雖同客衣色不染洛陽塵

藍上採石芥寄前李明府

淵明遺愛處山芥綠芳初翫此春陰色猶滋夜雨餘隔
溪烟葉小覆石雪花舒采采還相贈瑤華信不如

送贊法師往上都

遠近化人天王城指日邊宰君迎說法童子伴隨緣到
處花為雨行時杖出泉今宵松月下門閉想安禪

送沈少府還江寧

遠宦碧雲外此行佳興牽湖山入閭井鷗鳥傍神仙斜
日背鄉樹春潮迎客船江樓新興發應與政聲傳

送虞說擢第東遊

湖山不可厭東望有餘情片玉登科後孤舟任興行月
中巖子瀨花際楚王城歲暮雲臯鶴聞天更一鳴

送少微師西行

隨緣忽西去何日返東林世路寧嗟別空門久息心人
烟一飯少山雪獨行深天外猿啼處誰聞清梵音

送昆山孫少府

徇祿近滄海乘流看碧霄誰知仙吏去宛與世塵遙
遠帆背歸鳥孤舟抵上潮懸知訟庭靜窻竹日蕭蕭

送屈突司馬克安西書記

制勝三軍勁澄清萬里餘星飛龐統驥箭發魯連書
海月低雲旆江霞入錦車遙知太阿劍計日斬鯨魚

送時暹避難適荆南

三嘆把離袂七哀深我情雲天愁遠別豺虎擁前程
駐

馬戀携手隔河聞哭聲相思昏若夢
泪眼幾時明

送邊補闕省覲

東去有餘意春風生賜衣鳳凰銜
詔下才子採蘭歸
斗酒百花裏
情人一笑稀
別離須計日
相望在彤闈

送彈琴李長史往洪州

抱琴為傲吏孤棹復南行
幾度秋江水一作幾處皆添白雪

聲佳期來客夢幽思緩
王程佐牧無勞問
心和政自平

送宋徵君讓官還山

至人無滯跡，謁帝復思玄。
魏闕辭花綬，春山有杏田。
紫霞開別酒，黃鶴舞離絃。
今夜思君夢，遙遙入洞天。

送陳供奉恩勅放歸覲省

得意今如此，清光不可攀。
臣心堯日下，鄉思楚雲間。
楊柳依歸棹，芙蓉棲舊山。
采蘭兼衣錦，何似買臣還。

送外甥范勉赴任常州長史兼覲省

憐君展驥去，能解倚門愁。
就養仍榮祿，還鄉即晝遊。
橘花低客舍，蓴菜繞歸舟。
與報垂綸叟，知吾世網留。

隴右送韋三還京

春風起東道握手望京關
柳色從鄉至鶯聲送客還
嘶驂顧近驛歸路出他山
舉目情難盡羈離失志間

送元評事歸山居

憶家望雲路東去獨依依
水宿隨漁火山行到竹扉
寒花催酒熟山犬喜人歸
遙羨書窻下千峯出翠微

送武進韋明府

理邑想無事鳴琴不下堂
井田通楚越津市半漁商
盧

橘垂殘雨紅蓮拆早霜送君催白首歸水獨思鄉

送上官侍御

執簡朝方下乘軺去不賒感恩輕遠道入幕比還家碣石春雲色邯鄲古樹花飛書報明主烽火靜天涯

送郭秀才制舉下第南遊

失志思浪跡知君晦近名出關塵漸遠過郢興彌清山盡溪初廣人間舟自行探幽無旅思莫畏楚猿鳴

送夏侯審校書東歸

楚鄉飛鳥沒

一作外

獨與碧雲

一作片帆

還破鏡催歸客殘陽

見舊山詩成流水上夢盡落花間儻寄相思字愁人定

解顏

送衛功曹赴荆南

漢家仍用武才子晚成名惆悵江陵去誰知魏闕情碧
雲愁楚水春酒醉宜城定想褰帷政還聞坐嘯聲

送馬使君赴鄭州

東土忽無事專城復任賢喜觀班瑞禮還在偃兵年膏

雨帶菜水歸人耕圃田遙知下車日萬井起新烟

送郎四補闕東歸

無事共干世多時廢隱淪相看戀簪組不覺老風塵勸
酒憐今別傷心倍去春徒言樹萱草何處慰離人

送陸三出尉

春草晚來色東門愁送君盛才仍下位明代負竒文且
樂神仙道終隨鴛鴦羣梅生寄黃綬不日在青雲

送安都秀才北還

年少工文客言離却解顏不嗟荆寶退能喜綵衣還新
月來前館高陽出故關相思東北望燕趙隔青山

送褚十一溲擢第歸吳覲省

林表吳山色詩人思不忘向家流水便懷橘綵衣香滿
酌留歸驥前程未夕陽愴茲江海去誰惜杜蘅芳

送費秀才歸衡州

南望瀟湘渚詞人遠憶家客心隨楚水歸棹宿江花不
畏心期阻惟愁面會賒雲天有飛翼方寸佇瑤華

送陸郎中

事邊仍戀主舉酒復悲歌
粉署含香別轅門載筆過
鶯聲出漢苑柳色過漳河
相憶情難盡離居春草多

送僧歸日本

上國隨緣至來途若夢行
浮天滄海遠去世法船輕
水月通禪觀魚龍聽梵聲
惟憐一燈影萬里眼中明

送楊皞擢第游江南

行人臨水去新詠復新悲
萬里高秋月一作色孤山遠別

時掛帆巖子瀨
酌酒敬亭祠
歲晏無芳杜
如何寄所思

送田倉曹歸覲

青絲絡驄馬
去府望梁城
節下趨庭處
秋來懷橘情
別筵寒日晚
歸路碧雲生
千里相思夜
愁看新月明

送張管書記

邊事多勞役
儒衣逐鼓鼙
日寒關樹外
峯盡塞雲西
河廣篷難度
天遙鴈漸低
班超封定遠
之子去思齊

送蕭常侍北使

絳節引雕戈，鳴騶動玉珂。
戎城去日遠，漢使隔年多。
雁宿常連雪，沙飛半渡河。
明光朝即邇，秋社早成歌。

送李棲桐道舉擢第還鄉省侍

幾年深道要，一舉過賢關。
名與玄珠出，鄉宜畫錦還。
蓮舟同宿浦，柳岸向家山。
欲見寧親孝，儒衣稚子斑。

送柳道士

去世能成道，遊仙不定家。
歸期千歲鶴，行邁五雲車。
海上升春應，盡壺中日未斜。
不知相憶處，琪樹幾枝花。

送陸侍御使新羅 二首

衣冠周柱史才學我鄉人
受命辭雲陛傾城送使臣
去程滄海月歸思上林春
始覺儒風遠殊方禮樂新

萬里三韓國行人滿目愁
辭天使星遠臨水澗霜秋
雲佩迎仙島虹旌過蜃樓
定知懷魏闕回首海西頭

送陸贄擢第還蘇州

鄉路歸何早雲間喜擅名思
親盧橘熟帶雨客帆輕
夜火臨津驛晨鐘隔浦城
華亭養仙羽計日再飛鳴

送虞說擢第南歸覲省

南風起別袂心到衡湘問歸客
楚天遠孤舟雲水間愛
君採蓮處花鳥連家山得意且寧省
人生能幾還

送原公南遊

有意兼程去飄然二翼輕
故鄉多久別春草不傷情洗
鉢泉初煖焚香曉更清
自言難解縛何日伴師行


送萬兵曹赴廣陵

秋日思還客臨流語別離
楚城將坐嘯郢曲有餘悲
山

晚桂花老江寒蘋葉衰應須揚得意更誦長卿辭

送李判官赴桂州幕

欲知儒道貴縫掖見諸侯且感千金諾寧辭萬里遊鴈
峯侵瘴遠桂水出雲流坐惜離居晚相思綠蕙秋



錢仲文集卷五